

USKORO ZAVRŠETAK RADOVA NA ŠKOLSKOM DVORIŠTU OŠ „GRBAVICA I“

Općina Novo Sarajevo jedna je od 10 najuspješnijih općina u BiH koja je dobila nepovratna sredstva u okviru Projekta unapređenja efikasnosti lokalnih usluga (PIPLS) u Bosni i Hercegovini kojeg primarno finansira Švedska, a koji sufinansira i provodi Razvojni program Ujedinjenih nacija u Bosni i Hercegovini (UNDP BiH).

Općina Novo Sarajevo jedina je jedinica lokalne samouprave iz Sarajeva koja je ostvarila najbolje rezultate u implementaciji aktivnosti u okviru projekta PIPLS, te dobila značajna sredstva za realizaciju projekta sanacije školskog dvorišta OŠ “Grbavica I” sa kojim je aplicirala na Javni poziv.

Izvođač radova uveden je u posao 14.09.2023.godine i povoljni vremenski uslovi omogućili su da se svi radovi izvedu do kraja osim ugradnje gumene podloge i ograde. Zbog pogoršanja vremenskih prilika, radovi su obustavljeni i gumena podloga nije postavljena.

Izvođač je sada nastavio radove te se trenutno na terenu radi lijevana guma, a pripremljeni su i temelji za ugradnju ograde.

Završetak radova očekuje se uskoro nakon čega će se izvršiti primopredaja neophodne dokumentacije i izvedenih radova.

Projekat sanacije dvorišta OŠ “Grbavica I” sufinansiraju Općina Novo Sarajevo i UNDP BiH sa sredstvima u iznosu od 87.000 KM, dok sredstva Federalnog ministarstva kulture i sporta iznose 40.000 konvertibilnih maraka.

Osnovnu školu “Grbavica I” pohađa 570 učenika koji svakodnevno koriste školsko dvorište, kako tokom redovne nastave, tako i za vannastavne aktivnosti i boravak na otvorenom. Dvorište nije zadovoljavalo propisane standarde jer je izgrađeno 1950. godine, a posljednji put sanirano je 1997. godine. Ova škola je prepoznatljiva u KS po sportskim uspjesima svojih učenika/ca, te će stvaranje adekvatnih uslova za bavljenje sportom značajno doprinijeti postizanju još boljih rezultata i povećanju motiviranosti učenika/ca za bavljenje sportom općenito i unapređenju kvalitete života i zdravlja učenika/ca, kao i njihove sigurnosti.

Sanacija dvorišta ove škole doprinosi unapređenju odgojno-obrazovnog procesa, kao i poboljšanju uslova boravka i rada učenika/ca i nastavnika/ca, podizanju nivoa sigurnosti učenika/ca, te realizaciji vannastavnih aktivnosti.

Aktivnost/projekat se realizuje u okviru Projekta unapređenja efikasnosti lokalnih usluga u Bosni i Hercegovini (PIPLS) kojeg primarno finansira Švedska, a sufinansira i provodi Razvojni program Ujedinjenih nacija u Bosni i Hercegovini (UNDP BiH) i Općina Novo Sarajevo.